

Godišnji izvještaj

2024/2025.



FONDACIJA
HASTOR



FONDACIJA
HASTOR





Sadržaj

- UVODNA RIJEČ.....	3
- NAŠA PRIČA – 19 GODINA PREDANOSTI.....	4
- KAKO NAŠA PODRŠKA POSTAJE POKRETAČKA SNAGA ZAJEDNICE?.....	10
- DOGAĐAJI KOJI SU OBILJEŽILI 2024/2025. GODINU.....	19
- SARADNJE.....	23
- UGOVORI O STIPENDIRANJU.....	28
- ALUMNI KLUB.....	33
- NOVO IZ FONDACIJE HASTOR.....	36
- ISTAKNUTE ZVJEZDICE FONDACIJE HASTOR U 2024/2025. GODINI.....	39
- DIPLOMANTI I MAGISTRANTI 2024/2025.....	43
- O ZNAČAJU FONDACIJE HASTOR.....	46
- KLUB PRIJATELJA.....	47
- PRIDRUŽITE NAM SE.....	48

Uvodna riječ

Svaka je godina još jedna nova stranica uspjeha Fondacije Hastor. Krajem ove godine koja nas približava jubileju od dvije decenije postojanja, ispunjeni brojnim emocijama, želimo podijeliti s vama sve naše uspjehe – male i velike. Sve ono što smo nastavili slijediti, vođeni prethodnim godinama i našim temeljima, ali i ono novo što je postalo dio naše priče. Stranice ispred vas ispisuju još jednu godinu rada, truda, ulaganja, nesebičnosti i podrške zahvaljujući kojima danas ponosno možemo govoriti o svim postignućima. Spoj znanja, želje i plemenitosti savršen je recept za uspjeh, a godišnji izvještaj je idealna prilika da isti podijelimo s vama.

Naše volonterske aktivnosti sinonim su našeg rada i djelovanja. Širom Bosne i Hercegovine naši stipendisti organizirali su humanitarne i ekološke akcije, radionice, promovirali potencijale svojih gradova, kao i zdrave životne navike, pozitivne priče te pružili podršku baš onima kojima je u tim trenucima bila i potrebna. Iako je riječ o učenicima i studentima, možemo posvjedočiti da su oni već sada društveno-odgovorne i plemenite osobe koje slijede istinske životne vrijednosti. Kada govorimo o uspjesima Fondacije Hastor, upravo to smatramo najvećim uspjehom.

Raduje nas i to da smo u prethodnom periodu zabilježili sjajne rezultate i model volontiranja koji ima za cilj produbiti znanje učenika, omogućiti im pomoć i instrukcije, što nas je dodatno motiviralo za novi korak – omogućiti isto i učenicima koji nisu stipendisti Fondacije Hastor. "Zajedno za znanje i obrazovanje" naziv je projekta koji će biti predstavljen na stranicama ispred vas. Nastavljamo stvarati nove prilike za naše stipendiste uvodeći ih u poslovni svijet još za vrijeme studiranja i omogućavajući im praktično znanje iz oblasti za koje se obrazuju kroz mentorski program "Prvi korak u poslovni svijet". Nova generacija studenata krajem decembra uspješno će završiti program pod vodstvom vrsnih stručnjaka iz raznih oblasti – medicine, ekonomije, pedagogije i dr. S namjerom da svakom pojedinačnom studentu stipendisti omogućimo prilike koje će biti kvalitetna priprema za tržište rada, tokom godine za njih smo organizirali seriju panel-diskusija, dovodeći ih na isto mjesto s iskusnim profesionalcima iz najvećih kompanija u BiH.



Na svemu navedenom radimo predano i punim srcem kako bismo dokazali da naša domovina ima potencijal za razvoj i bolju budućnost, te da mladi ljudi imaju gdje ostaniti i graditi svoje impresivne karijere. Prirodni i ljudski potencijal Bosne i Hercegovine prikazujemo kroz novi YouTube serijal "Ponosnim koracima kroz BiH".

Godišnji izvještaj Fondacije Hastor prožima veliki broj pozitivnih priča i primjera nastalih širom Bosne i Hercegovine. Čitajući svaku novu stranicu, upoznat ćete se sa sjajnim mladima ljudima, mladim liderima koji čine svjetlo dobrote u svakom danu i čiji se plamen nikada ne gasi jer ga velikodušno dijele s drugima. A nama nije dovoljno ni hiljade stranica da opišemo koliko smo ponosni na njih.

Ljilja Donlagić

Direktorica Fondacije Hastor



NAŠA PRIČA – 19 GODINA PREDANOSTI

Fondacija Hastor osnovana je 2006. godine s ciljem pružanja podrške djeci i mladima širom Bosne i Hercegovine. Kroz gotovo dvije decenije djelovanja, Fondacija Hastor postala je jedan od najvažnijih pokretača obrazovanja i razvoja mladih u našoj zemlji, oslanjajući se na principe jednakih šansi, lične odgovornosti i društvene angažiranosti.

Temeljni je fokus Fondacije Hastor ulaganje u obrazovanje kao ključno sredstvo za jačanje ljudskih potencijala i izgradnju stabilnijeg društva. Kroz program stipendiranja hiljadama učenika i studenata iz svih krajeva BiH pružena je finansijska podrška i mentorska pratnja kako bi mogli neometano završiti školovanje i razvijati se kao odgovorni pojedinci. Uz to, svi stipendisti Fondacije aktivno učestvuju u volonterskim aktivnostima, pa je do danas realizirano više od 2.300.000 volonterskih sati, što nas čini jedinstvenom i jednom od najvećih organizacija u zemlji.

Pored podrške u obrazovanju, Fondacija Hastor sistematski radi na pripremi mladih za tržište rada kroz veliki broj projekata, radionica, obuka i saradnji s privatnim i javnim sektorom. Aktivno djeluje širom Bosne i Hercegovine, saradjujući sa školama, lokalnim zajednicama, kompanijama i međunarodnim organizacijama. Poseban značaj pridaje se izgradnji pozitivnog sistema vrijednosti kod mladih, razvoju liderstva, timskog rada i društvene odgovornosti.

Fondacija Hastor djeluje iz Sarajeva, ali njen utjecaj osjeća se u svakom dijelu naše zemlje. Više od 28.500 dodijeljenih godišnjih stipendija svjedoči o njenom kontinuitetu i posvećenosti. Kroz rad Fondacije izrastaju generacije mladih ljudi koji vjeruju u obrazovanje, pošten rad i solidarnost. Tome najbolje svjedoče hiljade bivših stipendista, danas uspješnih poslovnih ljudi koji svoje resurse stavljaju na raspolaganje Fondaciji Hastor i mladim generacijama stipendista.

U vremenu masovnog odlaska mladih ljudi u druge države, Fondacija Hastor svjetlo je za bolju budućnost u kojoj ćemo zajedno nastavljati širiti plamen dobrote.



**FONDACIJA HASTOR
U BROJKAMA**

2024/2025. godina u brojkama

439

SUPERODLIKAŠA

995

ODLIKAŠA

75

DIPLOMANATA

39

MAGISTRANATA

**VIŠE OD
2.350**

STIPENDISTA

Naš rast kroz godine

135

OPĆINA

600

OBRAZOVNIH INSTITUCIJA

VIŠE OD
28.500

**DODIJELJENIH
GODIŠNJIH STIPENDIJA**

**PREKO
2.300.000**

VOLONTERSKIH SATI



Proces odabira stipendista

Tokom cijele godine na adresu Fondacije Hastor stižu molbe za stipendiranje učenika. Aplicirati za stipendiju Fondacije Hastor moguće je na dva načina: putem pošte, slanjem pisane molbe na našu adresu ili putem web-stranice. U molbama pronalazimo osnovne podatke, kontakt podatke kao i podatke o školskom uspjehu, ali ono što je mnogo važnije – pažljivo i s visokom dozom empatije naš tim čita razne životne priče kroz koje upoznajemo potencijalne stipendiste Fondacije Hastor. Obrada svih pristiglih molbi u toku jedne godine vrši se u mjesecu martu, nakon čega svi kandidati prime instrukcije za kompletiranje potrebne dokumentacije. Na osnovu pristigle dokumentacije, vrši se bodovanje nakon kojeg tim Fondacije Hastor obavlja razgovore i upoznaje kandidate koji su ušli u najuži izbor i postigli najveći broj bodova. Nakon toga bodovanje se finalizira te, u zavisnosti od predviđenog budžeta za datu školsku godinu, stipendije se dodjeljuju određenom broju kandidata koji početkom školske godine potpisuju Ugovor o stipendiranju.

Konkurs za studente javno se objavljuje krajem godine i to je način na koji studenti mogu postati stipendisti Fondacije Hastor. Prijava se vrši isključivo online putem. Kao i kod učenika, konkursna procedura kod studenata ima više etapa bodovanja, uključujući i intervju te broj primljenih studenata, koji diktira predviđeni budžet.

1

2701

PRISTIGLA
MOLBA



2

**PREGLED
MOLBI**



3

**OBILAZAK
KANDIDATA**



4

**ZASJEDANJE
KOMISIJE
ZA DODJELU
STIPENDIJA**



5

**PRIJEM
254
NOVA
STIPENDISTA**



Kako naša podrška postaje pokretačka snaga zajednice?

Volontiranje predstavlja srž misije Fondacije Hastor i jedan je od najvažnijih aspekata stipendijskog programa, koji se ne temelji isključivo na finansijskoj podršci, već i na razvoju ličnih i društvenih vrijednosti kod mladih. Svaki stipendista Fondacije Hastor, bilo da je riječ o osnovcu, srednjoškolcu ili studentu, učestvuje u volonterskim aktivnostima tokom cijelog procesa stipendiranja. Ova obaveza nije zamišljena kao teret, već kao prilika da mladi postanu aktivni građani, da doprinesu zajednici i da kroz konkretan rad razvijaju empatiju, odgovornost i timski duh.

Specifičnost volontiranja unutar Fondacije Hastor ogleda se u njegovom obimu, kontinuitetu i organiziranosti. Do danas je zabilježeno više od 2.300.000 volonterskih sati koje su stipendisti proveli pomažući djeci u učenju, organizirajući edukativne i kulturne radionice, učestvujući u humanitarnim akcijama, sređujući škole, biblioteke i javne prostore, te pokrećući projekte koji rješavaju konkretne probleme u njihovim lokalnim zajednicama. Volonterske aktivnosti planiraju se i provode kroz sistem mentorstva, u kojem stariji stipendisti (studenti) prenose znanje i iskustvo na mlađe (učenike), stvarajući tako snažnu mrežu uzajamne podrške.

Ono što Fondaciju Hastor čini jedinstvenom jeste to što volontiranje nije sporedna ili dodatna aktivnost, već ključni element identiteta svakog stipendiste. Stipendisti se ne posmatraju kao pasivni korisnici finansijske podrške, već kao pokretači promjena, kao osobe koje uče kroz davanje, koje razvijaju svijest o svojoj ulozi u društvu i koji se od najranije dobi uče da uspjeh ima pravu vrijednost tek kada se dijeli. Kroz volonterski rad stipendisti grade samopouzdanje, profesionalne vještine i stvaraju neraskidive veze s vršnjacima iz svih dijelova Bosne i Hercegovine.

Na taj način, iz generacije u generaciju, Fondacija Hastor gradi zajednicu mladih ljudi koji njeguju istinske životne vrijednosti i svoje raspoložive resurse ulažu u zajedništvo i izgradnju boljeg društva za sve nas.



Naš doprinos lokalnim zajednicama

Tokom ove godine, stipendisti Fondacije Hastor bili su organizatori brojnih događaja, projekata i inicijativa koje su ostavile snažan trag u lokalnim zajednicama širom Bosne i Hercegovine. Kroz različite aktivnosti nastale su priče koje oslikavaju trud, predanost i zajedništvo mladih ljudi. Ovaj tekst donosi samo kratki pregled nekih od najistaknutijih aktivnosti iz proteklog perioda.

Povodom Međunarodnog dana maternjeg jezika, koji se obilježava 21. februara, grupa stipendista organizirala je volontersku akciju s ciljem promoviranja značaja maternjeg jezika i kulturnog naslijeđa. Amina Ibralić, Lejla Joldić i Muharem Ibrić, studenti stipendisti Fondacije Hastor, istaknuli su se kao organizatori ove inicijative, vođeni željom da podignu svijest o značaju maternjeg jezika. Stipendisti su organizirali: izradu panoa koji su izloženi u Gradskoj biblioteci u Kalesiji, podjelu letaka za građane, te edukativne diskusije o značaju maternjeg jezika. Na ovaj način pokazali su da su riječi i djela jednako moćni kada su vođeni iskrenom željom za pozitivnim promjenama.

Nedugo nakon toga, isti tim stipendista pokazao je još jednom svoju posvećenost zajednici kroz volontersku aktivnost "Zavrta priču – tvoj bicikl, tvoja avantura", koja je održana u Sportskoj dvorani Kalesija. Aktivnost za srednjoškolce u trajanju od dva sata imala je za cilj promovirati biciklističku kulturu, ukazujući na njene dobrobiti – ekološku prihvatljivost i zdrav način života. Mentori su priredili kratko predavanje o historijatu i zanimljivostima biciklizma. Kroz kviz učesnici su pokazali znanje o eko-održivosti i pravilima vožnje. Zaključna aktivnost bio je "Zid zahvalnosti biciklu", u kojem su srednjoškolci upisali svoje omiljene rute biciklom, kao i prednosti koje im ovo prijevozno sredstvo donosi. Od podijeljenih ličnih iskustava, posebno se ističe iskustvo Harisa Halilovića, stipendiste koji se biciklizmom bavi dugi niz godina. Kako sam kaže, biciklizmom je upoznao prirodu i historiju rodno grada ali i gradova oko Kalesije. Posebno naglašava vrijednost upoznavanja ljudi koji, kao i on, dijele ljubav prema ovom sportu.

April je simbolično mjesec posebnog činjenja dobra za stipendiste Fondacije Hastor širom Bosne i Hercegovine. Tokom ovog mjeseca, oni se aktivno uključuju u različite volonterske projekte i inicijative koje imaju za cilj donijeti osmijeh na lice drugima, pomoći onima kojima je podrška najpotrebnija i pokazati snagu zajedništva i solidarnosti. Vođeni vrijednostima koje Fondacija njeguje i svakodnevno primjenjuje, april je za njih samo još jedna prilika da kroz vlastiti angažman šire duh humanosti, nesebičnosti i odgovornosti prema društvu. Svako dobro djelo ostavlja trag, a svojim aktivnostima stipendisti Fondacije Hastor svjedoče koliko je važno činiti dobro – ne samo u aprilu već svakog dana.

Još jedna vrijedna grupa volontera dala je vrlo značajan doprinos svojoj lokalnoj zajednici – Konjicu. Tim koji čine stipendisti Kerim Beha, Hana Hrnjica, Nejlja Lepara i Vedad Žiko u okviru volontiranja u Fondacije Hastor pokrenuli su inspirativan projekat pod nazivom "Konjic kroz ljude i priče", s ciljem očuvanja historije, legendi i identiteta grada. Proces istraživanja obuhvatio je razgovore sa starijim sugrađanima, pretragu arhiva, muzejske zbirke, kao i saradnju s lokalnim kulturnim institucijama. Tokom istraživanja otkrili su mnoge fascinantne legende, poput one o izgradnji Starog mosta i priče o konjičkim majstorima drvorezbarstva. Posebnu inspiraciju pronašli su u liku poznatog Konjičanina i najznačajnijeg bosanskohercegovačkog putopisca Zuke Džumhura, kojeg opisuju kao "most između kultura", čovjeka otvorenog duha, kreativnosti i neiscrpne radoznalosti.





Specijalizirani timovi Fondacije Hastor

Uspjeh Fondacije Hastor zasniva se na predanosti i zajedništvu naših stipendista. Kroz različite timove unutar Fondacije, svaki stipendista ima priliku pronaći prostor za razvoj svojih vještina, učenje i doprinos zajednici. Naši timovi održavaju raznolikost talenata, interesa i sposobnosti, a u nastavku ćete ih upoznati kroz riječi samih članova i vođa timova.

• Administrativni tim

Administrativni je tim 2025. godine brojao 50 studenata volontera, koji su svoje vrijeme posvećivali različitim poslovima u službi stipendista. Naš primarni zadatak jeste biti spona između uposlenika Fondacije i stipendista – svaka poštanska pošiljka, telefonski poziv ili e-mail prolazio je kroz naše ruke. Tokom godine susretali smo se sa raznovrsnim zadacima: pripreme za potpisivanje ugovora, prikupljanje i obrada dokumentacije, provjera podataka, komunikacija s roditeljima i učenicima, te asistencija pri događajima i potpisivanjima ugovora. Svaki mjesec donosio je nove zadatke, a iza svega stoje hiljade dokumenata koje smo morali pregledati i uredno sortirati. Ipak, uz veliku ažurnost i kolegijalnost, pokazali smo da administracija može biti snažna i pouzdana karika u radu Fondacije. Svakodnevno smo radili na unapređenju tehnika rada, jer znamo koliko stipendija znači našim stipendistima i njihovim porodicama.

Makara Amidžić
Stomatološki fakultet



• Tim za protokol

Naš rad obuhvata preuzimanje, otvaranje pošte i protokoliranje cjelokupne dokumentacije koja je došla na adresu Fondacije. Dokumentacija obično uključuje prijave za stipendije, potvrde učenika i studenata te molbe budućih stipendista. Ako dokumenti nisu validni, kontaktiramo roditelje ili stipendiste radi dopune. Posebnu pažnju posvećujemo molbama za stipendiju – čitamo ih detaljno i provjeravamo podatke. Ono što je posebno kod našeg tima jeste preciznost i odgovornost, budući da svaka greška može utjecati na stipendiju.

Serla Kapić
Pedagoški fakultet



•Tim mentora koordinatora

Tim trenutno čini 18 studenata. Njegova je svrha poticati i održavati kvalitet volontiranja sa učenicima. Mentori koordinatori inspiriraju junior mentore iskustvom i znanjem, pomažu im u kreiranju kvalitetnih sastanaka te dijele literaturu i izvore. Oni provjeravaju godišnje planove i programe volontiranja, te drže obuke grupama radi boljeg razumijevanja procesa. Nakon toga je fokus na najavama za volonterske sastanke koje se šalju na mjesečnoj bazi u aplikaciji FH – sedam dana prije održavanja samog sastanka. Isto kao i u planu i programu, mentori koordinatori provjeravaju postojanje grešaka, ali i promoviraju i što više kreativnosti i zanimljivih zadataka i projekata. Postojanje ovog tima garantira kvalitet, jer okuplja odgovorne pojedince koji unapređuju i održavaju volonterske aktivnosti.

Aida Buza
Filozofski fakultet



•Monitoring tim

Monitoring tim jedan je od vodećih timova Fondacije Hastor. Naša uloga nije samo nadzor mentora, već i podrška i posredovanje između mentora i administracije. Pratimo izazove na terenu te osiguravamo da administracija na vrijeme bude obaviještena i da se potencijalni problemi riješe. Pored toga, naš tim prepoznaje i ističe inspirativne i kreativne pristupe mentora. Imamo priliku sagledati širu sliku i primijetiti različite metode motivacije i uključivanja učenika. Takvi primjeri, poput interaktivnih i pažljivo pripremljenih sastanaka, potvrđuju vrijednost našeg rada i inspiriraju cijelu zajednicu Fondacije. Monitoring tim ima dvostruku ulogu: osigurava kvalitet i kontinuitet rada te gradi most između mentora i administracije, dok istovremeno širi priče koje motiviraju i inspiriraju. Naš tim nije samo kontrola – mi smo podrška, oslonac i pouzdano mjesto na koje mentori uvijek mogu računati. Upravo ta kombinacija odgovornosti i podrške čini naš rad posebnim i daje motivaciju da svakodnevno doprinosimo Fonadaciji.

Almedina Bogunović
Medicinski fakultet



•Projektni tim

Kolegica Tajra i ja zadužene smo za projekte kao podršku u planiranju i realizaciji inicijativa koje doprinose razvoju lokalnih zajednica. Naš rad usmjeren je na stvaranje temelja za dugoročne i održive promjene, kroz analizu, saradnju i pripremu kvalitetnih projekata. Uz stalnu podršku i mentorstvo, pokazujemo visok nivo predanosti i odgovornosti, osiguravajući da svaki korak koji napravimo ima značajan i pozitivan utjecaj na zajednicu.

Tajra Sadiković
Medicinski fakultet



•Tim za Wikipediju

Naš tim posvećen je radu na korigiranju i unapređivanju postojećih Wikipedija članka, njihovom prevođenju, ali i pisanju potpuno novih sadržaja na bosanskom jeziku. Time nastojimo obogatiti dostupno znanje na internetu i pružiti priliku široj javnosti da se upozna s kvalitetnim, tačnim i relevantnim informacijama na našem jeziku. Kroz naš rad trudimo se osigurati da svaki članak bude jasno i precizno napisan, da se temelji na pouzdanim izvorima, te da bude pristupačan različitim čitateljima, bez obzira na uzrast i predznanje. Posebno nam je važno da kroz prevođenje i kreiranje sadržaja doprinosimo većoj vidljivosti bosanskog jezika i kulture na globalnoj digitalnoj platformi kao što je Wikipedija. Osim stručnog aspekta, naš tim njeguje i snažan duh zajedništva. Svaki član ulaže svoje vrijeme i energiju, a zajedničkim radom gradimo međusobnu podršku, učimo jedni od drugih i razvijamo vještine istraživanja, pisanja i kritičkog mišljenja. Vjerujem da naš trud neće ostati ograničen samo na trenutne projekte, već da će ostaviti dugoročan trag u promociji znanja i obrazovanja, te inspirirati nove generacije da nastave doprinositi.

Ngila Dedić
Fakultet umjetnosti i društvenih nauka



•IT tim

IT tim kroz kontinuirano održavanje i unapređenje zvanične web-stranice osigurava da sve važne informacije o radu Fondacije budu lako dostupne javnosti. Stranica ne služi samo kao mjesto informiranja stipendista i partnera već i kao snažan alat za promociju vrijednosti i misije Fondacije. IT tim svojom posvećenošću i tehničkom stručnošću doprinosi stvaranju pozitivnog imidža Fondacije Hastor, čineći je vidljivom, modernom i pouzdanom institucijom na digitalnom prostoru. Siguran sam da će naš tim nastaviti da doprinosi razvoju i prepoznatljivosti Fondacije Hastor, te da ćemo zajedničkim snagama ostvarivati nove uspjehe u godinama koje dolaze.

Mirza Rijanac
Fakultet informacijskih tehnologija



•Redakcija

Volonterski angažman u redakcijskom timu imao je izuzetan značaj za mene i za sve ostale članove našeg tima. Prilika za stjecanje radnog iskustva i primjenu teorijskog znanja stečenog na fakultetu u praksi je neprocjenjiva. Uređivanje i lektoriranje Newslettera bilo je moj prvi ozbiljan korak u poslovni svijet. Također, ponosna sam na kreativnost, predanost i profesionalnost naših članova. Vjerujem da svaki tekst, svaka aktuelna priča koja svoje mjesto nađe u mjesečnom izdanju biltena, svaka ideja i svaka inicijativa koju kreiramo inspiriraju i motiviraju. Pratiti značajne aktivnosti i uspjehe naših stipendista jednako je motivirajuće. Zajednički je cilj svih nas da kroz odgovorno i kvalitetno djelovanje doprinesemo ostvarivanju misije Fondacije – pružanju podrške obrazovanju, osnaživanju mladih i razvoju društva. Zajedno gradimo priču u kojoj se čuju glasovi naših stipendista i mladih ljudi te prenose vrijednosti koje zagovaramo – znanje, predanost i odgovornost.

Amina Bašić
Filozofski fakultet



•Tim za društvene mreže

Naš tim okuplja kreativne stipendiste koji zajedničkim radom kreiraju i oblikuju online prisustvo Fondacije Hastor. Primarni cilj nam je da kroz društvene mreže prenesemo poruke o vrijednostima koje njegujemo – obrazovanju, solidarnosti, volonterizmu i međusobnoj podršci. U praksi to znači da svakodnevno osmišljavamo i izrađujemo sadržaje koji prate aktivnosti Fondacije: od volonterskih akcija, preko edukativnih programa, do priča stipendista i uspjeha naših članova. Poseban naglasak stavljamo na autentičnost – želimo da naše objave budu više od puke informacije, da prenesu emociju i motiviraju druge da se priključe našoj misiji.

Amira Berbić

Fakultet za edukaciju i humanističke nauke



•Tim za grafički dizajn

Nije jednostavno opisati ono što mi radimo u nekoliko riječi, jer je toliko širok spektar kreativnih aktivnosti koje radimo, i svaka je posebna za sebe. Naprimjer, neke kolege rade na dizajnu letaka, neki na dizajnim za društvene mreže, videoprodukciji i slično. Postoje i zahtjevniji zadaci poput dizajna godišnjeg izvještaja, koji je veoma opširan i važan dokument za Fondaciju Hastor. Kolaboracija s drugim timovima ono je što nam je svima značajno, jer imamo priliku saradivati sa kolegama, naprimjer iz prevodilačkog tima, i upoznati se međusobno, saznati čime se oni bave i dijeliti iskustva. Neizostavno je i spomenuti koliko nam je rad u ovom timu pomogao i tokom studija, s obzirom na to da su većina kolega studenti grafičkog dizajna, te nam je svaki novi zadatak prilika za usavršavanje vještina za koje se i školujemo. Sva ta iskustva pomažu nam da se u očima budućih poslodavaca i saradnika predstavimo u najboljem svjetlu, jer nas svi više cijene kada napišemo u CV ili kažemo tokom intervjua da smo kreirali razne vrste kreativnog sadržaja za najveću fondaciju u regionu.

Sara Keserović

Fakultet za edukaciju i humanističke nauke



•Prevodilački tim

Iako članovi našeg tima dolaze iz različitih akademskih sfera, zajednička strast prema jeziku čini nas posebnim: učimo jedni od drugih, oslanjamo se na različite perspektive i zajedno rastemo kao prevodioci. Glavni razlog zašto naš tim postoji jeste to da omogućava dostupnost svih informacija i sadržaja o Fondaciji na engleskom i njemačkom jeziku, time omogućavajući informiranje o Fondaciji Hastor i van granica Bosne i Hercegovine.

Sara Kuduzović

Filozofski fakultet



Podrška znanju i obrazovanju

Kako bi dodatno osnažila svoje stipendiste i učenike, Fondacija Hastor uvela je inovativan pristup volontiranju kroz instruktivnu nastavu.

Ovaj koncept oblikovan je kroz šest klubova, uz poseban klub za talentirane učenike koji žele dublje istražiti svoja interesovanja.

Ovdje ubrajamo:

- Klub za bosanski, hrvatski i srpski jezik i književnost
- Klub za engleski jezik
- Klub matematičara i fizičara
- Klub za IT
- Klub za njemački jezik
- Klub zdravstvenih studija
- Klub za edukaciju

Klubovi su osmišljeni tako da svako od njih pokriva određeno područje znanja, a studenti stipendisti preuzeli su ulogu mentora, dijeleći znanje iz onoga što najbolje poznaju. Prošle godine postignut je izuzetan uspjeh, a i ove godine potvrđeno je da je ovaj model donio trajno značajne rezultate – učenici su ostvarili napredak, a stipendisti dodatno razvili svoje sposobnosti. Od uspjeha možemo izdvojiti naredna dva.

Naš stipendista Afan Limo, član Kluba matematičara i fizičara, pomogao je učenicima Sari Sikirić da popravi ocjene i položi eksternu maturu.

Prema Sarinim riječima, u periodu kada se pripremala za eksternu maturu, bila je suočena sa izazovima u matematici. Trud nije izostajao, ali gradivo jednostavno nije bilo jasno, a ocjene su bile ispod njenih očekivanja. Zbog toga je odlučila potražiti pomoć od svojih mentora, te na kraju stupila u kontakt s Afanom. Ističe da je ovo bilo jedno izvanredno iskustvo koje je donijelo još bolje rezultate, a ne sumnja da će se tako nastaviti.

Naravno, i Afan je odlučio podijeliti svoje doživljaje, budući da mu je ova godina prvi susret s Fondacijom Hastor: **Tokom ove školske godine naučio sam mnogo, ne samo u pogledu davanja instrukcija već i kako raditi i funkcionirati kao dio jednog posebnog tima. Ostvaren je i veći uspjeh gdje sam jednoj od učenica pomogao da popravi ocjene te položi eksternu maturu. U pitanju je Sara Sikirić. Radili smo intenzivno, pokazivala je interesovanje i trud te je uslijedio i rezultat kada me je jednog jutra dočekala poruka da je položila eksternu maturu.**



Afan Limo

Jasmina Salkić pomogla je učeniku Amaru Aliću da popravi prosjek. Fondacija Hastor primijetila je da Amar ima poteškoće u određenim predmetima, pa mu je organizirala instruktivnu nastavu upravo tamo gdje je bila najpotrebnija. Posebnu podršku pružila mu je studentica stipendistica Jasmina Salkić.

Imao sam problem u vezi s nekim predmetima, ali, zahvaljujući Jasmininim instrukcijama, uspio sam popraviti prosjek. Da nije bilo nje, vjerovatno bi se sve to drugačije završilo. Fondacija Hastor mi je mnogo promijenila život – postao sam sigurniji u komunikaciji s drugim ljudima, a uz rad i trud, uz Jasmininu podršku, postigao sam odlične rezultate. Najviše sam napredovao u matematici, ranije sam imao baš loše ocjene, a sada sam uspio dostići sasvim zadovoljavajući nivo.



Amar Alić



DOGAĐAJI KOJI SU OBILJEŽILI 2024/2025. GODINU

Tokom 2024/2025. godine Fondacija Hastor nastavila je s nizom značajnih aktivnosti kojima osnažuje mlade i pruža im priliku za profesionalni i lični razvoj, te dodatno učvršćuje svoju ulogu u obrazovnom i društvenom životu Bosne i Hercegovine. Fondacija godinama djeluje kao snažna podrška hiljadama stipendista širom zemlje, a svoje je programe dodatno obogatila povezivanjem teorijskog znanja s praktičnim iskustvom. Najvažniji su događaji zapravo kombinacija edukativnih i inspirativnih sadržaja, kroz koje je mladima omogućeno da se ne samo usavršavaju u stručnom smislu nego i da razviju osjećaj zajedništva i društvene odgovornosti.

Završena pilot faza mentorskog programa "Prvi korak u poslovni svijet"

Fondacija Hastor obilježila je uspješan završetak prvog ciklusa mentorskog programa "Prvi korak u poslovni svijet", namijenjenog stipendistima završnih godina studija, koji su imali priliku boraviti u profesionalnom okruženju i učiti od vrhunskih stručnjaka. Prvi ciklus ovog jedinstvenog programa održan je u ASA Bolnici, koja je otvorila svoja vrata za studente različitih oblasti, omogućivši im da teorijska znanja pretoče u stvarno radno iskustvo, rade s vrsnim stručnjacima iz svojih oblasti i koriste se najnaprednijom medicinskom tehnologijom. Planiranih 90 sati mentorstva preraslo je u impresivnih gotovo 300 sati – što najbolje svjedoči o motivaciji, kvaliteti rada i međusobnoj inspiraciji između mentora i mentija. Svečanost zatvaranja programa okupila je predstavnike uprava kompanija članica ASA grupacije, bivše stipendiste Fondacije Hastor – danas uspješne biznismene, profesore i druge veoma uspješne ljude, te studente stipendiste Fondacije Hastor, a učesnicima programa tom prilikom mentori su uručili priznanja o završenom mentorstvu.



Rezultat pilot faze: Stipendistica Anesa Resić postala dio kolektiva ASA Bolnice

Fondacija Hastor mentorskim programom "Prvi korak u poslovni svijet" studentima stipendistima otvorila je vrata poslovnog okruženja. Najbolji rezultat pilot faze jeste prvo zaposlenje u struci koje je postigla stipendistica Anesa Resić. Anesa je u sklopu mentorskog programa imala priliku učiti i raditi na Odjeljenju za radiologiju ASA Bolnice gdje je zajedno sa svojim mentorom dr. med. Emirom Gušom, specijalistom radiologije, prolazila kroz cjelodnevni rad u ovom dinamičnom Odjeljenju. ASA Bolnica i Anesin mentor prepoznali su uloženi trud i potencijal koji odlikuju našu stipendisticu te je Anesa po završetku mentorskog programa dobila prvo zaposlenje u struci i postala najmlađi inženjer radiologije u ASA Bolnici.



Uz novu generaciju nastavljen mentorski program "Prvi korak u poslovni svijet"

Nakon što je pilot faza mentorskog programa Fondacije Hastor "Prvi korak u poslovni svijet" uspješno rezultirala, nova generacija stipendista dobila je ovu sjajnu priliku.

U septembru 2025. godine zvanično je započeo novi ciklus mentorstva za 15 stipendista Fondacije Hastor. Tokom narednih mjeseci, do kraja tekuće godine, oni će imati priliku raditi s vrhunskim stručnjacima iz najuspješnijih kompanija u svojim sektorima: ASA Bolnice, ASA Grupacije, ASA Banke, ASA Energije, Poliklinike "Eurofarm", "Forspace Solutionsa" i "Prevent Industrialsa". Mentorstvu su se pridružile i alumnice Fondacije Hastor iz oblasti pedagogije i edukacije, koje su na ovaj način dale dodatni, značajan doprinos razvoju mladih stipendista i misiji Fondacije.

Cilj programa jeste da studente pripremi za izuzetno konkurentno tržište rada, ali i da im omogući dodatno profesionalno usavršavanje u oblastima za koje se školuju. Naše stipendistice imaju priliku provesti vrijeme u profesionalnom okruženju koje cijeni znanje, trud i posvećenost te koje je spremno svoje iskustvo i vještine nesebično podijeliti s njima.



Fondacija Hastor izlagač na devetom Dječijem sajmu

Početak novembra 2024. održan je deveti po redu Dječiji sajam, najveći festival za djecu i porodicu u Bosni i Hercegovini. Ovaj događaj godinama unazad privlači veliku pažnju porodica i posjećenost iz godine u godinu sve je veća. Imali smo zadovoljstvo biti izlagač na ovogodišnjem sajmu i prirediti sjajnu zabavu za mališane te ih adekvatno nagraditi.

Tema devetog Dječijeg sajma bila je mentalno zdravlje djece uz moto "Bez briga – samo igra". Kao izlagač, Fondacija Hastor maksimalno se posvetila da ukaže na značaj mentalnog zdravlja djece te su naši predstavnici u sklopu sajma prisustvovali i panel-diskusijama o ovoj temi.

Za one najmlađe posjetioce sajma spremili smo takmičenje za najbolji likovni/literarni rad o temi "Moja učiteljica/odgajateljica". Nakon završetka dvodnevnog sajma pobjednicima je uručena nagrada.



Održana panel-diskusija "Liderstvo u praksi"

U organizaciji Fondacije Hastor krajem 2024. godine održana je panel-diskusija "Liderstvo u praksi", koja je okupila vodeće osobe ASA grupacije i stipendiste Fondacije Hastor. Gospodin Eldin Hadžiselimović, generalni direktor ASA grupacije, Samir Mustafić, predsjednik Uprave ASA Banke, i Rasim Jusufović, predsjednik Uprave ASA Bolnice, u predivnom ambijentu ASA Instituta govorili su o liderstvu, poslovnom i ličnom uspjehu te vrijednostima koje ni u kojem slučaju ne smiju biti zanemarene. Na početku panel-diskusije prisutne je pozdravila Lejla Đonlagić, direktorica Fondacije Hastor, dok je panel moderirala naša alumnistica i PR Fondacije Hastor Dženana Zulum. Panel-diskusija omogućila je studentima stipendistima priliku da postave pitanja liderima vodećih kompanija u Bosni i Hercegovini te da dobiju savjete i primjere kojih će se sjetiti i godinama kasnije. Zaključeno je da su za napredak potrebni rezultati, da je uvijek važno davati svoj maksimum, a, pritom, na tom istom putu ostati dobar čovjek.



"Razgovori za posao: samopouzdanje ili ego?"

U prostorijama ASA Instituta u maju 2025. godine organizirana je i druga panel-diskusija za studente stipendiste o temi "Razgovori za posao: samopouzdanje ili ego?", koja je okupila stručnjake iz sektora ljudskih resursa. Ovaj dinamični panel odgovorio je na pitanje koje se nameće mladima prilikom potrage za zaposlenjem – kako ostaviti snažan utisak i preći najvažniji korak do zaposlenja? Na ovom panelu govorili su vrhunski HR stručnjaci, profesionalci s dugogodišnjim iskustvom u sektoru ljudskih resursa: Vesna Bugarović – menadžerica ljudskih resursa i radno-pravnih poslova ASA Bolnice, Elvedina Zrnić Hrković – direktorica sektora za ljudske resurse ASA Central osiguranja, te Semir Mujkanović – menadžer odjela za ljudske resurse u "Eurosjaju" i alumnistica Fondacije Hastor. Studenti su, zahvaljujući bogatom iskustvu i znanju panelista, dobili odgovore na ključna pitanja: kako HR stručnjaci razlikuju samopouzdanje od ega, zašto nije dobro "glumiti samopouzdanje i znanje", koje su to najčešće





Saradnje ostvarene
u 2024/2025. godini

• Općine iz BiH podržale rad Fondacije Hastor

Fondacija Hastor može se pohvaliti da već skoro 20 godina ima jako dobru saradnju s velikim brojem općina i gradova sa područja cijele Bosne i Hercegovine odakle i dolaze naši stipendisti – učenici i studenti. Riječ je, kako o većim tako i o manjim sredinama, koje su, kako su nam godine našeg rada i dokazale, iznjedrile veliki broj uspješnih mladih ljudi, onih koji su bili i koji su dio Fondacije Hastor. Upravo je zbog toga za nas posebna priča biti prijatelj sa zajednicama u svim dijelovima naše države.

Ove godine proširili smo Klub prijatelja i ostvarivanjem saradnja s gradom Konjic i općinama Travnik, Bratunac, Busovača i Bugojno koje su prepoznale rad Fondacije Hastor te je potpisan Memorandum o saradnji koji predstavlja pravac zajedničkog rasta, jačanja obrazovanja i osnaživanja mladih generacija u ovim gradovima.

Grad Konjic i Općine: Travnik, Bratunac, Busovača i Bugojno prepoznali su rad Fondacije Hastor koja godinama kontinuirano pruža podršku osnovcima, srednjoškolicima i studentima iz njihovih gradova.

Saradnja Fondacije Hastor s općinama i gradovima predstavlja pravac zajedničkog rasta, jačanja obrazovanja i osnaživanja mladih generacija u ovim gradovima. Sretni smo što su lokalne vlasti to i prepoznale te smo veoma zahvalni na tome.





- **Nastavljena saradnja Općine Novi Grad Sarajevo i Fondacije Hastor**

Saradnja Općine Novi Grad Sarajevo i Fondacije Hastor, započeta prije nekoliko godina, i u ovoj godini je rezultirala pružanjem finansijske i mentorske podrške učenicima osnovnih i srednjih škola te studentima s područja općine Novi Grad Sarajevo.

Prepoznajući važnost mentorske i finansijske podrške, Općina Novi Grad Sarajevo je dala podršku realizaciji navedenog projekta. Pored finansijske, učenici su kroz učešće u projektu dobili mentorsku podršku kroz edukativne radionice na teme poput: značaja aktivizma mladih i njihove uloge u društvu, važnosti formalnog i neformalnog obrazovanja i sl. Uz to, kroz volonterske aktivnosti u lokalnoj zajednici ukazano im je na značaj volonterizma mladih, motivisani su na kontinuirane volonterske aktivnosti u lokalnoj zajednici i osposobljeni za samostalno osmišljavanje istih i po završetku projekta.

Sretni smo da na našem putu inspirisanja mladih ljudi i kreiranja boljih uslova za njihovo obrazovanje i napredak imamo ovakvu podršku i ponosni smo i zahvalni na ostvarenoj saradnji.



- **"Planika Flex" nagradila najuspješnije stipendistice Fondacije Hastor**

Koncem 2024. godine, društveno odgovorna kompanija "Planika Flex" nagradila je najuspješnije stipendistice Fondacije Hastor. Pedeset pet visokokvalitetnih pari ženskih patika milanskog brenda "Baggat" uručeno je stipendisticama koje su se svojom marljivošću i zalaganjem istakle u prethodnom periodu.

Ovakve geste prijatelja i donatora Fondacije Hastor nisu samo pokloni, već motivacija i snažna podrška mladim ljudima koji istrajno rade na stvaranju bolje budućnosti i, bez obzira na sve izazove modernog društva, nose istinske vrijednosti u sebi.



- **"Deloitte" radionice**

Za kraj 2024. godine organizirali smo još jednu sjajnu radionicu za stipendiste Fondacije Hastor. U saradnji s "Deloitteom" održana je radionica o temi "Snažan lični brend mladih profesionalaca: LinkedIn, CV, intervju za posao". Tržište rada danas je izuzetno konkurentno, a pristigli CV na adresu potencijalnog poslodavca i sami intervju odlučujući su faktori u profesionalnom angažmanu. Svjesni značaja ove teme i kontinuiranog rada na njoj, okupili smo zainteresirane srednjoškolce i studente koji su imali priliku čuti praktične savjete o izgradnji ličnog brenda kroz kreiranje kvalitetnog CV-a, sadržaja na LinkedInu te pripreme za intervju za posao koji će im omogućiti da se istaknu u odnosu na ostale kandidate. O ovoj temi za stipendiste Fondacije Hastor govorila je Una Karabeg, marketing senior specijalista u kompaniji "Deloitte BiH" i alumnistica Fondacije Hastor.

• Ljetni raspust u Holandiji

Projekat "Ljetni raspust u Holandiji", koji Fondacija Hastor u saradnji s holandskom organizacijom Stichting Kinderhulp Bosnië realizira još od 2007. godine, i ovog ljeta pružio je djeci iz BiH priliku da iskuše nezaboravnu avanturu. Putovanje je krenulo iz Goražda, a emotivan rastanak s roditeljima bio je posebno težak jer su se mnogi mališani prvi put odvajali od kuće. Djeca su bila smještena kod holandskih porodica, koje su ih srdačno dočekale i učinile da se brzo prilagode novom okruženju. Tokom boravka, obišli su brojne atrakcije, a oduševili su ih i brojni sadržaji: roller coasteri, bingo i nagrade, kupanje u jezeru, piknici, posjete kućama iz bajki, te muzički show, koji je dodatno uljepšao njihovo putovanje. Naše stipendistice Sevla Kopic i Selma Krivokapa bile su vođe mališanima, te ističu da je projekat bio izazovan, ali ispunjen radošću i toplinom. Sevla posebno naglašava bogatstvo upoznavanja nove kulture, običaja i tradicije, dok Selma putovanje opisuje kao priliku da izađe iz zone komfora i nauči se strpljenju, zahvalnosti i važnosti pomaganja drugima. Ova ljetna čarolija u Holandiji ostavila je neizbrisive uspomene, donijela nova prijateljstva i dokazala koliko jedno putovanje može promijeniti pogled na svijet.





Ugovori o stipendiranju



Potpisani ugovori o stipendiranju s učenicima osnovnih i srednjih škola za školsku 2024/2025. godinu

Fondacija Hastor s radošću je dočekala nove stipendiste – učenike osnovnih i srednjih škola. Posjetili smo sve krajeve naše države, potpisali ugovore o stipendiranju i podržali 358 učenika. Ovim činom otvorena su im vrata ne samo finansijske podrške već i prilike da rastu, uče i zajedno doprinose boljem bosanskohercegovačkom društvu.

Koncept stipendiranja Fondacije Hastor jedinstven je upravo zato što spaja materijalnu podršku s vrijednostima volontiranja. Naši stipendisti ne primaju samo mjesečnu stipendiju, oni svoje znanje, vrijeme i energiju nesebično ulažu u zajednicu, pomažući drugima i prenoseći pozitivni duh altruizma.

I ove godine nastavljamo svoju misiju: vjerovati u potencijal, podržati obrazovanje mladih i inspirirati ih da kroz svoje djelovanje budu pokretači pozitivnih promjena.



Stipendiranje učenika s područja pogođenih poplavama 2024. godine

U oktobru 2024. godine Fondacija Hastor stavila je sve svoje resurse na raspolaganje stanovništvu pogođenom poplavama te smo, osim na terenu, svoju podršku pružili i kroz stipendiranje učenika koji dolaze s područja koje je zadesila teška prirodna nesreća.

130 učenika iz općina: Konjic, Jablanica, Mostar, Kiseljak, Fojnica i Kreševo potpisivanjem svojih ugovora o stipendiranju, zvanično su postali stipendisti Fondacije Hastor. Oni će, kao i svi naši stipendisti, pored kontinuirane finansijske podrške, imati niz benefita koje u Fondaciji Hastor omogućavamo našim stipendistima, a koji se odnose na prilike i mogućnosti koje unapređuju znanje, pomažu razvoj vještina te stvaraju snažni networking.

Proces stipendiranja proveden je u saradnji s predstavnicima općinskih i kantonalnih vlasti, čime je omogućeno efikasno i pravovremeno okončanje odabira i potpisivanja ugovora.

Ovim aktivnostima Fondacija Hastor potvrđuje svoju predanost razvoju bosanskohercegovačkog društva i osnaživanju mladih generacija, ostajući pouzdan oslonac građanima Bosne i Hercegovine i primjer odgovornog društvenog djelovanja.

Potpisani ugovori o stipendiranju sa studentima stipendistima za akademsku 2024/2025. godinu

Krajem oktobra 2024. godine održano je potpisivanje ugovora o stipendiranju sa studentima stipendistima za akademsku 2024/2025. godinu. Ovim činom nastavili smo našu misiju ulaganja u obrazovanje i podrške mladima na njihovom putu prema ličnom i profesionalnom razvoju.

Naši studenti stipendisti još jednim potpisanim ugovorom dokazali su da zalaganjem, uspjehom i društvenim angažmanom zaslužuju snažnu podršku kakvu imaju od Fondacije Hastor.

Stipendije ne predstavljaju samo finansijsku pomoć, već i potvrdu da trud i posvećenost mladih ljudi imaju vrijednost i podršku.

Novi studenti stipendisti potpisali ugovore o stipendiranju

Krajem decembra 2024. godine upriličili smo i potpisivanje ugovora o stipendiranju novih studenata stipendista.

Prethodnih je godina kriterij Konkursa za stipendiranje studenata bio usmjeren prema studentima s iznimno visokim akademskim rezultatima, a iako i dalje cijenimo izvrsnost u učenju, ove godine mogućnost apliciranja pružili smo za studente svih akademskih profila, bez obzira na prosjek.

Novi stipendisti Fondacije Hastor sada mogu očekivati dalji razvoj svojih akademskih i profesionalnih vještina kroz podršku Fondacije Hastor. Potpisivanje ugovora predstavlja prvi korak u zajedničkom putovanju, u kojem ćemo uz predanost i puni entuzijazma graditi temelje za uspješne karijere i društvenu odgovornost.



Alumni klub

Alumni klub Fondacije Hastor, koji čini snažnu mrežu prijateljstva, i u ovoj godini nastavio je sa svojim redovnim aktivnostima te uvođenjem novih u cilju snažnije podrške mlađim generacijama stipendista Fondacije Hastor.

Novogodišnji paketići za korisnike Dječijeg doma Bjelave, Sigurne kuće Sarajevo, Udruženja porodica sa četvero i više djece "Budućnost 4" Doboj te Dječijeg doma Mostar

Kraj 2024. godine naši alumni obilježili su na njima svojstven način – plemenito i srdačno.

Naime, povodom novogodišnjih praznika, alumni Fondacije Hastor pripremili su novogodišnje paketiće za korisnike Dječijeg doma Bjelave, Sigurne kuće Sarajevo, Udruženja porodica sa četvero i više djece "Budućnost 4" Doboj te Dječijeg doma Mostar. Prije same pripreme, članovi Alumni kluba kontaktirali su navedene ustanove kako bi se upoznali s potrebama njihovih korisnika, a potom kreirali paketiće koji su, osim osnovnih i korisnih stvari, sadržavali i sitnice namijenjene da izmame osmijeh na licima mališana. Na taj način, Alumni klub Fondacije Hastor još jednom je pokazao da su praznici podsjetnik na ono najvažnije – da smo jedni drugima potrebni. Snaga njihove zajednice ogleda se ne samo u profesionalnim uspjesima, već i u činjenici da je riječ o ljudima koji njeguju istinske vrijednosti – dobrotu, solidarnost i spremnost da podrže one kojima je pomoć najpotrebnija.



Treća redovna sjednica

Početak maja održana je treća redovna sjednica Skupštine Alumni kluba Fondacije Hastor, koja je, u skladu s godišnjim planom, realizirana u online formatu. Pod vodstvom predsjednice Marizele Avdić, potpredsjednice Emine Sijahović i sekretara Alema Merdića, članovi Skupštine imali su priliku razmotriti i detaljno analizirati tačke dnevnog reda. Najznačajnija tačka bila je početak korištenja Alumni aplikacije koja je ovom prilikom i predstavljena, dok je ostatak sjednice bio posvećen planiranju budućih aktivnosti Alumni kluba.

Alumni aplikacija

Jedna od najznačajnijih novosti predstavljenih alumnistima bila je Alumni aplikacija Fondacije Hastor. Ova inovativna platforma kreirana je kao jedinstvena mreža komunikacije i podrške među bivšim stipendistima, s ciljem jačanja međusobne povezanosti i saradnje. Aplikacija omogućava razmjenu ideja, zajedničko djelovanje i dijeljenje poslovnih prilika između bivših i trenutnih stipendista. Kao svojevrsna društvena mreža, osmišljena posebno za zajednicu Fondacije Hastor, aplikacija stavlja naglasak na networking, profesionalni razvoj i trajnu međusobnu podršku. Ona simbolizira neraskidivu vezu između stipendista i Fondacije te njeguje vrijednosti zajedništva, znanja i inovativnosti na kojima Fondacija istrajava još od svog osnivanja. Uz ovakve inicijative, članovi Alumni kluba Fondacije Hastor potvrđuju da nisu samo zajednica mladih profesionalaca, već i ljudi koji nesebično brinu o drugima.



Godišnja sjednica Skupštine Alumni kluba

Krajem septembra tekuće godine, u inspirativnom ambijentu ASA Instituta održana je četvrta redovna sjednica Skupštine Alumni kluba Fondacije Hastor. Bila je ovo sjajna prilika za sumiranje godišnjih rezultata Alumni kluba kao i za planiranje predstojećih aktivnosti u kojima će značajan doprinos dati naši bivši stipendisti. Sjednica je bila konstruktivna te smo ustanovili promjene koje će dodatno unaprijediti Alumni aplikaciju. Osim toga, alumnistima su predstavljene kolegice/alumnistice koje su uzele učešće u mentorskom programu Fondacije Hastor "Prvi korak u poslovni svijet" kroz ulogu mentorica, te je nagoviješteno prisustvo alumnistu u ovom programu i u narednim fazama. Osim radne atmosfere ovaj događaj pružio je neprocjenjivo vrijedne prijateljske momente ispunjene iskrenošću, zahvalnošću i ljubavlju, što je i svojstveno alumnistima Fondacije Hastor.



Novo iz Fondacije Hastor

- **"Ponosnim koracima kroz BiH"**

Sredinom godine Fondacija Hastor započela je još jedan novi projekat koji ima za cilj predstaviti puni potencijal Bosne i Hercegovine i u moru odlazaka biti svijetla tačka koja navodi stotine razloga zašto ostati u domovini.

Riječ je o novom YouTube serijalu "Ponosnim koracima kroz Bosnu i Hercegovinu" u kojem donosimo inspirativne priče iz svakog kutka naše domovine. Zajedno s našim uspješnim alumnistima obilazimo njihove rodne gradove i općine, mjesta koja kriju neprocjenjive ljepote ali i priče koje dokazuju da mladi u BiH mogu stvoriti uspjeh, ostati i ulagati u sebe i svoju domovinu. Kroz razgovore o prirodnim bogatstvima, historiji, turističkom potencijalu, obrazovanju i razvoju zajednice, upoznat ćete lice BiH koje nadahnjuje, lice u kojem se prošlost, sadašnjost i budućnost susreću u koracima mladih koji vjeruju u ovu zemlju.

Do sada smo imali priliku upoznati: Jajce, Livno, Goražde, Mostar, Banja Luku i Tešanj. U periodu ispred nas donosimo nove priče iz drugih gradova širom Bosne i Hercegovine.





FONDACIJA HASTOR

Zajedno za znanje i obrazovanje

- **Zajedno za znanje i obrazovanje**

Fondacija Hastor pokrenula je program "Zajedno za znanje i obrazovanje", namijenjen učenicima osnovnih i srednjih škola širom Bosne i Hercegovine, a koji nisu zvaničnim dijelom Fondacije Hastor, odnosno, nisu stipendisti. Cilj je programa podržati učenike u savladavanju školskog gradiva, razvijanju novih znanja i vještina te pružanju kvalitetnijeg neformalnog obrazovanja. Na taj način učenici dobijaju priliku da prevaziđu poteškoće u učenju, ostvare bolji uspjeh i jačaju svoju konkurentnost na tržištu rada.

Program se realizira kroz instruktivnu nastavu putem online platformi i kroz radionice "Radoznali umovi". Radionice vode najuspješniji studenti iz različitih oblasti, a učenicima nude priliku za dodatno istraživanje, stjecanje novih vještina i razvijanje radoznalog duha.





Istaknute zvjezdice Fondacije Hastor u 2024/2025. godini

Fondacija Hastor koristi svaku priliku da naglasi uspjehe svojih stipendista. Oni su obrazovani i talentirani mladi ljudi koje smo kroz proteklih godinu dana imali priliku upoznati kroz Newsletter, gdje smo obilježili njihove velike uspjehe.





Berina Tihčić, stipendistica Fondacije Hastor i mlada sportistkinja, koja ima samo 14 godina i već je vlasnica titule državne prvakinje u teakwandou. Ova mlada sportašica ima za cilj da osvoji prestižnu titulu prvaka Balkana, te da postane dio Reprezentacije Bosne i Hercegovine u taekwandou.



Anja Udovčić talentirana je violinistica iz Zenice koja svojim izvanrednim muzičkim umijećem i predanošću osvaja publiku i kritiku širom regije. Svoje prvo veliko dostignuće ostvarila je na IX gudačkom festivalu "Stringfest" u Sremskoj Mitrovici 2019. godine. Osim toga, posebno se izdvaja osvajanje prvog mjesta na takmičenjima "Sergei Rachmaninoff" u Sarajevu i "Primavera" u Bijeljini, gdje je njen talenat došao do punog izražaja. Njene izvedbe odlikuju se tehničkom preciznošću, izražajnom interpretacijom i umjetničkom zrelošću, što je prepoznato od stručnog žirija i publike.



Emina Hodžić mlada je Fojničanka koja gaji strast prema ekonomiji i umjetnoj inteligenciji. Već sada Emina je učestvovala na dvije Međunarodne ekonomske olimpijade – u Bratislavi i Grčkoj – gdje je osvojila srebrenu medalju. Naša talentirana stipendistica već je uspješno kreirala dvije aplikacije koje unapređuju rad umjetne inteligencije: "SafeTrack", aplikacija za poboljšanje sigurnosti u saobraćaju, i "MyndStyle", aplikacija koja pomaže pacijentima oboljelim od ALS -a komunicirati putem tehnologije za praćenje pokreta očiju.



Mirza Rujanac je mladi i talentirani IT entuzijasta. Dolazi iz Donjeg Vakufa gdje je završio osnovno i srednjoškolsko obrazovanje, a trenutno je student Fakulteta informacijskih tehnologija u Mostaru. Jedno je od najvećih Mirzinih postignuća ove godine praksa u Njemačkoj. Riječ je o poziciji softver developera u SAP-u, najvećoj softver kompaniji u Evropi. Tokom prakse, naš vrijedni stipendista radio je na implementiranju, testiranju i održavanju funkcija na već postojećim proizvodima ove kompanije.



Rewda Cvrčak, stipendistica Fondacije Hastor, inovativno je spojila tehnologiju i kulturu. Naime, Rewda je osmislila program u kojem je, uz pomoć telefona ili tableta, moguće vidjeti kako su izgledali stari gradovi, tvrđave i ulice te čuti priče koje ih povezuju s tradicijom. Ovaj program Rewda je predstavila na BOLD konferenciji u New Yorku.



Iman Nur Smailbegović, još je jedna talentirana stipendistica Fondacije Hastor, čiji je način života, kako sama kaže, balet. Jedan od njenih najvećih uspjeha jeste osvajanje državnog prvenstva u baletu. Paralelno s International Baccalaureate programom, uspješno gradi baletnu karijeru te je njen naredni cilj nastup na svjetskom prvenstvu.



Farah i Dalal Feriz su sestre i stipendistice Fondacije Hastor čiji je životni put usmjeren na obrazovanje i sport, tačnije, karate. Obje su odlične učenice koje van nastave nižu medalje s brojnih takmičenja. Starija sestra Farah iza sebe ima više od 70 medalja te je proglašena perspektivnim sportistom od Ministarstva kulture i sporta. Mlađa sestra Dalal prati svoju stariju sestru po broju takmičenja i osvojenih medalja.



Hana Kazić, studentica Grafičkog dizajna i multimedije i stipendistica Fondacije Hastor, osim ljubavi prema dizajnu i produkciji, gaji posebnu ljubav prema fotografiji. Hana je učestvovala na takmičenju "Living without leaving" koje je otvorilo vrata za mlade kreativce jadransko-jonske regije. Pristigao je veliki broj radova, a naša sjajna stipendistica sa svojom fotografijom "The tram girl" našla se među 15 odabranih radova koji su prikazani u Grčkoj, Belgiji, Albaniji i Sjevernoj Makedoniji.



Amar Bišćić, učenik Richmond Park International Secondary School u Tuzli i stipendista Fondacije Hastor, briljirao je na prestižnoj International Greenwich Olympiad (IGO) u Londonu, takmičenju koje okuplja mlade inovatore iz cijelog svijeta. Svojim projektom o proizvodnji čiste energije iz algi osvojio je priznanje i još jednom potvrdio da predanost, znanje i inovativnost vode ka izuzetnim rezultatima.



Hamza Turulja, mladi bh. karatista i stipendista Fondacije Hastor, postao je svjetski šampion karatea na prestižnom takmičenju Serije A u Salzburgu. Naš uspješni stipendista pobjedu je osvojio na svom prvom nastupu u kategoriji do 84 kg. Takmičenje u ovoj seriji odavno nije bilo konkurentnije, a Hamza je uspio savladati predstavnike Francuske, Kazahstana, SAD-a, Austrije, Srbije i Japana te ovom pobjedom postati jedini karatista u Bosni i Hercegovini koji ima dvije zlatne medalje s ovog nivoa takmičenja.



Kemal Durić prvi je student iz Bosne i Hercegovine koji je imao priliku raditi prestižnu medicinsku praksu na Klinici za neurohirurgiju Univerzitetske bolnice u Marburgu. Ovaj je program Kemal, između ostalog, omogućio da iz prve ruke vidi kako funkcioniše jedna vrhunska univerzitetska bolnica te da osjeti vrijednost timskog rada, discipline i predanosti pacijentu. Istovremeno je imao priliku uključiti se i u naučnoistraživačke aktivnosti, što dodatno proširuje njegove horizonte. Tokom svog boravka u Njemačkoj imao je i izuzetnu priliku da zajedno sa doc. dr. Anisom Gradašćević obiđe savremeni dijagnostički centar u Aschaffenburgu. Pored toga, prisustvovao je i stručnoj obuci iz urgentne i intenzivne medicine, što mu je omogućilo da proširi svoje znanje i vještine u ovoj oblasti.

A young woman with long blonde hair, wearing a black graduation cap and a white shirt with a dark vest, is smiling and resting her chin on her hand. She is standing behind a stack of books on a white table. The background is a solid light blue color.

Predstavljanje magistranata i diplomanata

DIPLOMANTI



- Aletić Nezir
- Avdić Maida
- Bajrić Amila
- Bašić Emira
- Bećirević Amina
- Bećiodobašić Medina
- Berbić Amina
- Beha Kerim
- Begović Ehlimana
- Bukvarević Amina
- Cvrčak Rewda
- Dilaver Nejra
- Dedić Adin
- Dedić Dženita
- Dedić Nejla
- Dželilbašić Ajla
- Džinić Ajla
- Đuliman Ajdin
- Đezić Mirzana
- Fejzić Lejla
- Fidani Elvedina
- Gološ Azra
- Glamočak Amila
- Gluvačević-Dujmović Tea
- Hadžić Fatka
- Hasanović Ajla
- Hasanović Iman
- Hodžić Amila
- Horman Hana
- Halilović Dženeta
- Kazić Hana
- Kevrić Adnan
- Keserović Sara
- Kezo Amina
- Kosovac Zerina
- Karašin Armina
- Kahrić (Latić) Murisa
- Lepara Nejla
- Lejlić Dženita
- Limo Afan
- Lipovac Irma
- Kalaba Džejla
- Maksumić Dženisa
- Mehmedović Sumeja
- Meštrovac Emina
- Mujkić Fadila
- Mujkić Selma
- Muhamedović Lejla H.
- Novalić Elvira
- Omerdić Asmir
- Omić Ajla
- Osmanović Nermin
- Osmanović Nermina
- Pašić Aiša
- Pajalić Merima
- Puhalo Srđan
- Rajić Ivan
- Ramić Eldina
- Rujanac Mirza
- Salkić Tajana
- Sarajlić Edin
- Sarajlić Sara
- Selimić Adna
- Skopal Saida
- Sofović Nadira
- Srna Safet
- Stambolić Alma
- Stranjak Lorens
- Sulejmanović Adela
- Tiro Fatima
- Varupa Emir
- Žilić Ferida
- Žulj Tara-Iva
- Zukančić Adan

MAGISTRANTI

Alić Elma
Čolić Nermina
Delalić Đana
Delić Amina
Džihan Irma
Đuderija Samra
Fejzić Džana
Grbo Minea
Hrnjica Zerina
Ibrahimović Šeherzada
Ibričić Maja
Josipović Aleksandar
Karahmet Dalila
Karić Dina
Karić Venesa
Kolasević Hana
Kopić Sevla
Kovačević Sivac Minela
Krnjić Amna
Kuduzović Sara
Lazić Iva
Mešić Aida
Mujanović Mejrema
Oprašić Adna
Osmanagić Tajra
Pljakić Nejla
Pozder Emela
Rahmanović Merima
Resić Anesa
Sadiković Tijana
Saračević (Spahić) Amina
Sinanović Almedin
Smajlović Melisa
Šahbaz Edin
Šarić Amina
Tinjak Ilhana
Turulja Hamza
Tursunović Amila
Velagić Amar



O značaju Fondacije Hastor

O značaju Fondacije Hastor i uspješnosti naše misije najbolje govore oni koji su dijelom nje. Čak i kada se završi proces obrazovanja, naši stipendisti ostaju vezani za Fondaciju kao svako drvo za svoj korijen. Njihove riječi naša su snaga, nepresušna motivacija, a s vama dijelimo poruke samo nekoliko njih, jer za hiljade dragocjenih poruka nemamo dovoljno prostora.

Sama činjenica da postoji neko ko vjeruje u vas i posvećuje se vašem dugoročnom razvoju govori mnogo o ulozi Fondacije u životima stipendista. Kroz godine podrške, osjećala sam se osnaženom i motiviranom da napredujem znajući da neko stoji iza mene kao oslonac u mom razvoju.

Nihada Sivić

Fondacija Hastor mi je mnogo promijenila život – postao sam sigurniji u komunikaciji s drugim ljudima

Amar Alić

Fondacija Hastor pružila nam je podršku, smjernice i prostor za razvoj. Na ličnom planu naučili smo strpljivije slušati druge i cijeniti njihove priče, dok smo na profesionalnom razvili vještine timskog rada, istraživanja i pisanja.

Kerim, Hana, Nejlja i Vedad

U volontiranju je bilo i lijepih i teških trenutaka. Naučio sam kako organizirati prostor i pripremiti se za časove. Pokušavao sam pronaći neku vezu s djecom, što nije uvijek bilo najlakše. Shvatio sam da je posao učitelja težak posao, i shvatio sam da to nije ono čime bih se ja mogao baviti u životu. Tako su Fondacija Hastor i volontiranje indirektno utjecali na moje buduće odluke u izboru profesije

Nasir Kujraković

Fondacija Hastor mi je omogućila dodatni razvoj vještina i stjecanje novih znanja. Osim toga, stipendija mi daje širu perspektivu i kvalitetniju pripremu za buduće profesionalne izazove.

Emina Hodžić

Fondacija Hastor mi je, osim novčane pomoći, pružila nešto mnogo veće. Dobio sam i još jednu porodicu koja cijeni moje uspjehe, obznanjuje ih i daje mi jak vjeter u leđa.

Hamza Turulja

Kroz Fondaciju Hastor upoznala sam ljude koji su mi promijenili život nabolje, naučili me da cijenim samu sebe, vjerujem u svoje sposobnosti i sanjam veće snove. Hvala vam u ime svakog stipendiste čiju budućnost gradite i za koju se nesebično zalazete.

Anesa Resić

Vaša podrška nije bila samo finansijska. Bila je mnogo više od toga. Kroz Fondaciju sam naučila koliko je važno pomagati drugima, biti odgovoran, ustrajan i vjerovati u sebe čak i onda kada je najteže. Svaka stipendija bila je podsjetnik da nisam sama, da imam nekog ko vidi moj trud i ko vjeruje u moj potencijal.

Fatima Zahirović

Bez podrške Fondacije, ovakav iskorak u mom obrazovanju ne bi bio moguć. Fondacija nije samo finansijska potpora – ona je istinski saveznik u mom razvoju; zajednica koja nas, mlade ljude, uči vrijednostima znanja, humanosti i solidarnosti. Prateći me tokom mog obrazovnog puta, Fondacija mi je dala sigurnost i motivaciju da težim izvrsnosti, a moj boravak u Marburgu najbolji je dokaz koliko su ulaganje i povjerenje koje Fondacija pruža svojim stipendistima isplativi i značajni.

Kemal Durić

Kada pričamo o Fondaciji Hastor, pored finansijske podrške, volontiranje pruža novi svijet prilika za napredak

Asmir Omerdić



Klub prijatelja

Kroz punih devetnaest godina svog postojanja, Fondacija Hastor svakodnevno unapređuje svoje aktivnosti i djelovanje, a sve u cilju ulaganja u obrazovanje i izgradnju kvalitetnijeg i prosperitetnijeg bosanskohercegovačkog društva. Zahvaljujući angažmanu svih koji se svojim radom i djelom vežu za Fondaciju Hastor, prvenstveno njenog kolektiva, razvila se u najznačajniju i najveću fondaciju ove vrste na području Bosne i Hercegovine i regiona. Danas, kada Fondacija ponosno broji više od 2.350 stipendista, uz nju stoji mnoštvo prijatelja i donatora koji prepoznaju misiju Fondacije i aktivno je podržavaju. Svojom nesebičnom podrškom te odlukom da svoju društvenu odgovornost usmjere ka investiranju u obrazovanje, naši prijatelji i donatori čine mogućom dugoročnu misiju Fondacije Hastor s vjerom da pozitivne promjene u društvu i njegova svjetlija budućnost dolaze zajedničkim radom, znanjem i uspješnim obrazovanjem.

VOLONTERI FONDACIJE HASTOR

Ahmetović Edin	Kotorić Keser
Alijagić Belma	Šejla Lagumdžija
Alić Alem	Jusufbegović Jasmina
Broz Zoran	Lazović Nejla
Bugarović Vesna	Lončar Aida
Čengić Alija	Manov Ismira
Čiva Edina	Mekanić Šemsudin
Dedić Amela	Merdić Alem
Delić Sanel	Mededović Nina
Dumanjić Samir	Milinović Linda
Durmo Selma	Morankić Feđa
Džafer Merima	Moro Haris
Đapo Haris	Musić Indira
Đonlagić Lejla	Mustafić Samir
Ergun Neyla Yasemin	Mulabdić Adi
Gagula Refija	Mujkanović Semir
Gavranović Aida	Narančić Alma
Ganić Dželila	Nešust Semra
Gelić Irma	Palić Safet
Gušo Emir	Pašić Rabija
Hadžić Marizela	Pulić Mirza
Hadžić Mehmedalija	Plančević Nermina
Hadžiselimović Eldin	Pilav Fuada
Hajdarević Dželila	Redžepović Aida
Hasanović Merima	Redžepović Samir
Hadžiefendić Bahrudin	Rizvo Marizela
Hodžić Adnan	Sarajlić Haris
Huseinović Šukrija	Sarić Maida
Hrković Zrnica Elvedina	Sijahović Emina
Imamović Halima	Šabanović Mirsad
Jusufović Rasim	Šehović Miralem
Jusufović Selma	Šumanović Faris
Kavazović Esmir	Škrebo Armin
Klapić Eldar	Tahirović Jasmin
Krtalić Neven	Tulumović Azur
Kučuk Adisa	Vuk Edina
Kulo Begić Emra	Zulum Dženana

...i neka nam ne zamjere mnogi drugi, trebalo bi nam još makar 50 stranica da napišemo svu ljubav i pozitivnu energiju koju dobijamo od svih naših volontera.

Pridružite nam se.

Fondacija Hastor organizacija je koja punih 19 godina djeluje na području Bosne i Hercegovine tako što ulaže u obrazovanje djece i mladih, a posebno onih koji su marginalizirani zbog teškog socioekonomskog statusa i sredine u kojoj žive. U školskoj i akademskoj 2024/2025. godini Fondacija broji više od 2.350 osnovnoškolaca, srednjoškolaca i studenata koji su izabrali obrazovanje kao glavno oruđe za stvaranje svoga uspjeha i pokretanje svih velikih promjena unutar našeg društva. Pored materijalne pomoći stipendistima, nastojimo pružiti moralnu podršku i kontinuiranu motivaciju za dalje napredovanje i usavršavanje. Poučeni prethodnim iskustvima, poznanstva ostvarena tokom stipendiranja, nova iskustva i mnoštvo savjeta otvorili su još šire vrata ka kasnijem zaposlenju i novim životnim šansama. Zbog velikog broja aplikacija za stipendiju koje svakodnevno pristižu na adresu Fondacije, nažalost, neke se od njih moraju nerado odbiti i kroz vršenje selekcije izabrati najbolji od najboljih. Kako bismo svojoj velikoj porodici mogli pridružiti još više vrijednih i sposobnih mladih ljudi kojima je vjetar u leđa veoma potreban, i nama je potrebna podrška prijatelja koji s nama dijele istu viziju. Djelovanje Fondacije Hastor je usmjereno ka stvaranju stabilnijeg i perspektivnijeg bosanskohercegovačkog društva, koje se temelji na ispravnim vrijednostima i jednakim prilikama za sve, a u čijem se središtu nalazi sam proces obrazovanja i mladi ljudi.

Ovim putem pozivamo sve pojedince, kompanije i organizacije da postanu dio Kluba prijatelja Fondacije Hastor i pomognu nam da veliki broj stipendista dobije priliku za uspješno obrazovanje tako što će na svojevrsan način doprinijeti osiguravanju finansijskih sredstava za stipendiranje djece i mladih širom Bosne i Hercegovine. Pridružite se našoj misiji i pomozite nam da zajedničkim snagama pokažemo da obrazovanje uistinu jeste izbor pobjednika!

Podržite nas.

Ukoliko želite podržati rad Fondacije Hastor, uplatu donacije možete izvršiti na jedan od transakcijskih računa:

ASA Banka dd Sarajevo

1346101000825159

Raiffeisen Bank BH dd Sarajevo

1610000055230065

Unicredit Bank dd Sarajevo

3389002201775656



Upravni odbor

Hadžiselimović Eldin, predsjednik

Kučuk Adisa, članica

Jusufović Rasim, član

Komisija za dodjelu stipendija

Redžepović Samir, predsjednik

Hadžić Mehmedalija, član

Hodžić Adnan, član

Huseinović Šukrija, član

Morankić Feđa, član

Planinčević Nermina, članica

Vuk Edina, članica

Tim Fondacije Hastor

Donlagić Lejla, direktorica

Dedić Amela, menadžerica Odjela za obrazovanje i odgoj

Kulo Begić Emra, koordinatorica Odjela za obrazovanje i odgoj

Nešust Semra, saradnica za administraciju

Čengić Alija, administrativni asistent

Alić Alem, administrativni asistent

Sarić Maida, menadžerica Odjela za projekte, razvoj i promociju

Ergun Neyla Yasemin, saradnica za projekte i edukaciju

Zulum Dženana, saradnica za odnose s javnošću



FONDACIJA
HASTOR